

四庫全書

集部

欽定四庫全書

文忠集卷九十七

掖垣類藁四

宋 周必大 撰

新除敷文閣直學士知潭州劉岑改除敷文閣

待制依舊宮觀 十一月二十二日

勅昔祖宗之侍近臣也一青豈嘗遂廢白首猶拜州馬  
忠厚之風至于今是賴肆予寡昧欣慕前烈舊人無幾  
我尚有之具官某稟邁往之資忘泛愛之累紹興初載

已踐高華流落雖久精明未減故加峻職起殿大邦朕則曰惟爾之能人則曰惟爾不任聽言念舊思酌厥中次對奉祠併為爾寵惟古之忠臣不忘君於畎畝况道籍西清者乎何必牧民乃能報國可

吳璘保明正侍大夫宣州觀察使右軍統制楊

從儀落階官除正任防禦使

八月九日

勅自匈奴絕和親攻當路塞獨西師所向無前此吳氏父子功也雖則云然尚猶推勞諸將亦賢矣哉具官某

久在戎行智而有勇素馳滅宮之志今逢李廣之時攻  
散關克敵營據原隰聲震三輔厥功茂焉元帥以聞我  
商賚汝差擇名郡授以禦戎之印爾尚畢精靖慮協贊  
兵機以共平多壘毋謂萬里而忘汝知可

武經郎郭昇元係敦武郎閣門祇候緣轉武翼  
郎依例除落閣職可特與除閣門宣贊舍人

九月二十五日

勅具官某介于諸使即解上閣之職者例不可越公道

存焉若夫恩以馭幸則人主執其柄矣往思謹畏用稱所蒙可

平和大夫貴州團練使判太醫局能誠轉兩官

合轉成安大夫

係德壽官醫官

勅具官某昔巫咸以鴻術為帝堯之醫後世蓋祖述焉今爾淹貫古書發明新意肆繇推擇執藝於光堯之宮不曰榮遇乎疊進官榮制食益厚古人可勉毋自怠焉

吏部狀承紹興三十二年正月十三日三省樞密院

機速房劄子京西北路招討使吳拱奏據鄧州在城  
僧道士庶段昇等狀仗為知本州蕭中一身係契丹  
心順宋朝密授旗榜不意內有白阡戶經劉萼等告  
變中一知事不捷遂挈家歸正迷路行至州北百餘  
里被賊劫散拱差軍馬尋接到中一男并夫人家小  
護送已到鄧州外中一因刼被村民殺死乞優加褒  
贈及將本官男穎推恩已行下鄧州優加存恤及將  
蕭穎權補武翼大夫小貼子蕭中一妻耶律氏見帶

番偽蘭陵郡夫人次妻耶律氏并妾路氏蕭穎妻耶律氏各未有封號正月九日三省樞密院同奉聖旨依奏蕭中一令所屬優加褒贈蕭中一妻與加封餘人依條封號本部參照比擬欲將蕭中一換贈正任觀察使優加褒贈與贈正任承宣使及本人妻耶律氏與封碩人蕭中一次妻耶律氏妾路氏並封孺人蕭穎妻耶律氏隨大見今官與封安人四月十九日奉聖旨蕭中一特贈節度使與封郡夫人餘依吏部

指定到事理施行權中書舍人周某劄子內有稱呼  
合行申明今具下項一吏部擬蕭中一前銜作故奉  
國上將軍等今欲乞稱故歸正人某官一吏部擬蕭  
中一妻耶律氏前銜並係偽官今欲乞稱故贈某軍  
節度使蕭中一妻蘭陵郡夫人某氏一吏部擬蕭中  
一次妻耶律氏前銜亦繫偽官今欲乞稱故贈某軍  
節度使所有次妻二字別無經據若直稱妾又恐與  
路氏無別今欲乞用小妻二字

出漢書

仍乞朝廷比路



氏量與加封庶得允當一吏部擬蕭中一妾路氏前  
銜亦係偽官今欲乞稱故贈某軍節度使蕭中一妾  
路氏候指揮十一月六日奉聖旨依內蕭中一小妻  
耶律氏特改封安人

故歸正人奉國上將軍武勝軍節度使兼鄧州  
管内觀察使威畧軍都總管護軍蕭中一贈  
節度使

勅春秋爵潞子漢興封弓高蓋嘉其能慕諸夏則進之

念其出于世胄則侯之古之道也况夫舉族來歸不遂厥志追褒之寵其可限以常法哉具官某北方之貴種南陽之良守戰爭之際逆順未分而能遏兵鋒保城邑仁也尊中國背夷狄忠也有是二美而天命不祐中道隕越朕甚傷之惟擁旄授鉞以待勲績之殊絕者今以綏爾茲為異恩魂而有知服予一人之嘉命可

蕭中一妻耶律氏封郡夫人

勅契丹事我朝百有餘年歡盟之篤古未有也中罹蕩

析其遺民男女寧無厭兇虐思前好者乎具封某氏君  
長之胄歸於名王懷我大德勉夫款塞今其嫠矣何以  
錫之重錦魚軒易其羶毳昔太祖謂孟昶之母曰俟平  
太原當送母歸故鄉今朕方以蕩平為期他日亦將歸  
爾于燕薊姑服新命毋戚戚焉可

小妻耶律氏封安人 妾路氏同詞

勅某氏遠行慕義越境來歸朕嘉其懷忠而閔其非命  
故推恩渥徧逮家人祇服美名安于其室可

男武翼大夫穎妻耶律氏封安人

勅某氏惟爾先舅功在南陽心嚮王化不幸踣于道路  
聞之惻然朕方優恤厥家以勸來者仰事俯育繫爾夫  
是賴茲用列爾命婦貴其閨門尚服寵光知朕招携懷  
遠之意可

靖海軍節度使李寶曾祖朝散大夫大理寺丞

舜卿贈太子少保

登極赦恩

勅鄉者金人造舟膠西為浮海之策天誘良將之衷水

擊火攻剽殄滅之俾無遺育雖曰賴國威靈伐賊秘計亦惟爾李氏三世將昌以集此休命肆予寵嘉之具官某積善在身陰功及物寧嗇其報以遺後人暨寶遂興成此偉蹟粵由橫列一命而植六蠹近世蓋未有也茲予踐阼加寵魯門廷尉之丞驟亞宮保可謂非常之澤矣庶幾幽壤歆我追褒可

四川宣撫制置使司奏瓦亭戰功右武大夫高師中高海特轉遙郡刺史武功大夫朱秀楊

萬特轉右武大夫拱衛大夫秀州刺史吳勝  
轉遙郡團練使武功大夫賀州刺史朱勇轉  
遙群團練右武大夫陶師仲轉左大夫武功  
大夫胡清轉右武大夫右武郎楊序轉拱衛  
郎

勅完顏氏逆天敗盟首犯秦隴吾大將厲使諸校轉關  
千里兵威之盛聞於天下惟爾具官某等稟授方畧咸  
奮智勇攻水洛戰瓦亭追犇逐北僵尸相屬執其渠率

百三十有七人獲首三百二十有六級城邑寢平權輿于茲予惟寵嘉之或遞進橫班或寵陞遙寄其尚祇服厚賞共盡圖來効稱朕知有功之意焉可

兩浙東西路通泰海州沿海制置使充京東東路招討使李寶下出戍暴露官兵董舜臣等依六月一日指揮各特與轉一官資殿內右朝散郎楊景雄轉右朝請郎

勅具官某等詩曰靡室靡家玁狁之故此非文王之時

乎念我士卒久勤戍役特推異數徧于六軍而將臣寶以名聞者萬三千有六十歲進厥秩爾景雄蓋其一也賞行維信尚徃欽哉可

右武大夫成州團練使鄂州後軍副統制華旺  
去年策應趙樽立功最多未經推賞七月二  
十七日聖旨除正任防禦使

勅中國蓄威養銳踰二十年矣一旦強敵窺邊士飽馬騰誰不自奮乞資衆力扞我于艱有功未疇何以示勸



具官某天資忠勇益以權謀久處兵間為下所服向者率汕鄂之衆濟陳蔡之師鯁賊喉牙固吾疆圉肆嘉勲効驟正扞防今邊陲少安而備禦尤急爾其遠斥堠練士卒精器械非常之績尚勉圖之可

海州劫寨身死長行翁顏贈承信郎與一子守

闕進勇副尉 十月二十八日

勅某人爾頃以乘邊勇於摩壘被傷而死深所哀矜進秩錄孤尚歆卹典可

蔡州陣亡有家屬承節郎李貴贈三官與兩資

恩澤進義校尉宋琪贈承節郎與一子進勇

副尉已下並十月二十八日降旨

勅某人等昔者下襄漢之甲底定蔡方雖師直為壯人  
百其勇然不能救爾於鋒鏑之下吾是以知兵之為凶  
器戰之為危事也悲夫宜詔司勳進官而錄其後忠魂  
未泯歆我閔章可

蔡州陣亡官兵無家屬李雲等十九人各贈承

節郎

勅某人等爾等既為國而捐其軀又無家以續其祀可謂重不幸也已進官何及尚慰九泉哀哉可

和州陣亡官兵左武大夫韋永壽贈八官與恩澤八資於橫行遙郡上分贈合贈中衛大夫

遙郡觀察使

六月九日

勅日亮既蹈窮寇翔歷陽且歸矣而王師遏之雖匹馬騎輪欲其無返然兵法之所難也具官某奮熊羆之

力忘蜂蠆之毒反令送死之寇歸爾如生之元厚進厥  
官貶恩稱是少紓痛悼尚克享之可

兼知臨安府趙子瀟修城了畢轉一官

十一月  
十三日

勅天子守在四夷故城成周而君子小之雖然清風至  
而城郭不修入其國者有以觀政矣爾具官某之行內  
史也有張敞之儒術而鄙其婿有廣漢之聰明而耻其  
訐未嘗諂附以干譽知悉意於公家而已故昔者事勞  
而今逸昔者財困而今裕復以餘力相崇墉而新之肆

子一人汝嘉夫京兆郡國首爾既能以治辦為二千石  
倡矣朕亦何惜一官不以風曉諸道乎尚其丕欽且有  
後寵可

成閔保奏瓜州及阜角林陣亡官兵武功至武  
翼大夫部進張千張進王玘張仙李榮王昱  
張宥楊和朱洪等一十人各贈六官與六資  
恩澤係於橫行遙郡上分贈

勅先日單于自將送死廣陵王師一勝于阜林再戰于

瓜州雖稍折其鋒而吾士馬亦少耗矣具官某等皆門將也奮其勇智力扞大敵身膏野草朕用閔傷橫班遙寄追錫休命且詔有司悉錄其孤嗚呼死者不可復生姑致吾悼念而已可

將仕郎竹友直用紹興二十八年修展外城及修城門賞循右修職郎

勅具官某修闢闔閤今四年矣賁伐來上其如初詔可軍器所兼提點右武大夫忠州團練使輔達兼

同提點協忠大夫忠州團練使李福監督製  
造軍器精緻特與轉行一官輔達轉階官李

福轉遙郡

九月二十三日

勅朕玩易之萃而知戎器不可以不除誦詩車攻而知  
器械不可以不備粵初嗣服首儀圖之以爾具官某久  
服戎行見稱材敏肆予選擢付繕工之事蒞職屬耳而  
敵干敕甲鍛矛礪刃皆以善聞朕甚嘉之序陟橫班益

勤毋怠可

李福改付繕作貳  
繕改橫班作兵防

逮康都統制下使臣時貴押馬五十疋倒斃二

十五匹降一官更展二年磨勘

三宗政降  
官同詞

勅某人地用莫如馬今日先務也爾効牽雖遠何至損  
其十半乎曠職如斯惡得無罪可

臨安府修城官第二等通判劉遠轉一官

勅具官某漢城長安至發侯王之徒隸今亡是也間民  
無常職則予其直而庸焉民既子來功宜亟就殆茲第  
賞小大不遺矧汝夙著能稱久貳壯邑職雖外徙朕豈



汝忘序進一階尚圖報稱可

成閔保明馬軍司主管機宜文字宋藻往來道  
路勞役又該出成暴路賞轉一官隨軍使

換右迪功郎國大同轉從事郎

勅具官某等采薇遣戍也杖杜勞還也皆告以王事靡  
盥故其詩有憂而不怨之象馬爾頃從將臣更涉寒暑  
例遷厥秩用酬跋履之勤視古歌詩蓋加厚矣徃其祇  
服可以忘勞可

右迪功郎鎮江府司戶權察推逢維翰裁埋庶

角暗椿自建康界至江陰軍界闕百七十里

循一資

四月二十九日

勅具官某往者邊兵大入所以備之者百方木雍槍纍  
自江干以屬于海爾吏京口與有董序之勞序進一階  
尚其祇服可

李顯忠保明淮西楊林渡陣亡王勻等一千三

百七十五人內武顯大夫董寶武翼大夫王

勻各贈六官於橫行遙郡上分贈與六資恩  
澤八月六日

勅楊林之戰殺傷相當朕一聽磬聲未嘗不思當時死  
事之將也具官某勇於敵愾忠不顧身馬革裹尸卒成  
素志泰山如礪莫副我心遙寄橫階舉為懿典錄派與  
幼多至六人生者既已有歸沒者庶無憾矣可

鄂州吳拱申武略郎申立成忠郎元廣今年正  
月內四次蔡州立奇功卒患身死元係合轉

八官之人九月二十四日聖旨與贈八官申

立合贈右武大夫遙郡刺史元廣贈武經郎

勃生而資其力死則廢其功非人情也具官某素推拳

勇屢戰蔡城方趣定封遽悲薄命峻升橫列仍刺大州

庶幾有知服我休命可

元廣用申詞仍改四句云進階  
八等時乃異恩九原有知尚或

能  
享

成閔奏額外翰林醫効殿前司隨軍醫治賜緋

魚袋李宗訓該收復蔡州等賞轉額外翰林

醫官

八月三日勅

勅某人去歲夏出禁旅冬戍淮蔡暑行無瀉疫士寒無  
輒瘡其醫事者預有勞焉遷秩示恩益進其授可

成忠郎安知和楊雄勳秉義郎曾輔武功郎江

昌朝武經郎李峻秉義郎張士魚並該修製

奉上德壽宮冊寶賞各轉一官 九月八日勅

勅具官某等朕惟父母至恩大德無物可稱乃詔攸司  
鏤玉牒播鴻名少致歸美之義率百官而上之國有大

慶所及者廣故如汝等例獲進階榮幸則多廉勤乃稱  
可

吳璘申已罷姚仲都統安撫職事送文州知管  
聽候朝廷指揮所有東路軍馬逐急差夔州  
安撫李師顏奉聖旨依所申差李師顏權行  
節制如能任職保明申三省樞密院契勘中  
侍大夫武當軍承宣使知夔州李師顏今年  
三月收復德順軍立功自權上件職事委能

任職乞正差克興元府駐劄御前諸軍都統  
制利州東路安撫使馬步軍都總管兼知興  
元府事奉聖旨依

勅朕西望梁州密運秦分內護列營之衆外信關國之  
威謀帥甚難得人乃授具官某素懷忠槩屢立戰多疇  
昔乘邊人皆推其武畧今茲推轂朕亦藉其威名分東  
道之帥符付漢中之軍政既聞試可何以假為惟國家  
倚爾為長城惟士卒恃爾為司命勿辜任使勉赴功名

可

左迪功郎王萬修用昨任勅令所刪定官日經  
修紹興叅附尚書吏部勅令格式等循修職  
郎

勅具官某事既無窮法亦隨制此國家設官議令之意  
也汝嘗為之屬與去取馬員雖省而成書之賞不廢朕  
恩厚矣尚往欽哉可

武德大夫關寶監督製造軍器精緻轉一官



勅具官某備甲兵鍛戈矛諸侯之事也猶見稱於詩書  
况朕君臨萬方思靖多壘則於技巧器械烏可忽哉嘉  
汝有督治之勞茲用進秩一等益辦乃事體予見知可

御營宿衛使司準備差遣右儒林郎趙汝勣結  
局轉兩官已改右宣教郎更轉右通直郎

勅具官某往者第賞天營爾既釋南曹之選而隸審官  
之籍矣有司稽其功狀尚以為言故令進爵一級以應  
勲格膺茲異數可不勉哉可

右奉直大夫葉灼男右迪功郎葉均獻錢一萬  
二千貫循右文林郎

勅具官某人貲賜爵前世有所不免然非怠於養兵而  
重於加賦則吾亦安取此汝能體國疊命進階徃服寵  
章榮其里閭可

右從事郎梁山軍判官石明緒右迪功郎解延  
運並任房州房陵縣尉日賣鹽增遞年一倍

以上各循一資

辛巳十月九日

勅具官某等邊城戶口寢增故鬻鹽倍蓰於他日爾嘗  
為尉用是蒙賞不既幸乎可

保義郎郝謚管押溫州錢綱違程兩月降一官

壬午

勅具官等水陸之運可以日計儻愆期會宜小懲之可

歸明人忠武校尉雲騎尉趙吉同女婿車全劉

福去年十二月汝州陣亡趙吉與換從義郎

上贈三官與恩澤三資車全劉福並白身各

贈承節郎各與一名進勇副尉

壬午七月  
日勅

勅某人等汝舅甥慕義自拔來歸而銳於立功至同時以死達于予聽為之惻然追命錄孤尚其知享可

右朝奉大夫提轄文思院上下界王棟該第二

冊寶賞轉一官減二年磨勘

壬午十二月  
十日

勅具官某朕總公卿之議奉徽號於兩宮鏤玉範金禮備而文縟雖曰工善其事亦惟爾董治之勞序陟文階尚其祇服可

溫州通判張大年起發經總制錢最違慢降一

官

勅具官某自調兵戍邊用度日滋吾不敢一毫橫斂於民若常賦又不時至將何賴焉溫大州也汝為之丞宜先而後鐫官示沮且警他邦可

鳳州梁泉縣嘉陵谷善濟侯加封英顯善濟侯

近因金人侵犯常起雲霧風雨使賊不安并江水常盈不悞糧餉事

勅某神敵人頽兵西陲徂伺秦隴賴神之靈凡天時地

利吾率得之維履信思順朕猶有愧而獲助如此其何  
敢忘申錫嘉名以示無德不報之義尚恢况施迄靜邊  
虞

昌化軍寧濟廟偽漢封永清福夫人今改封顯

應夫人

轉運司狀三十一年亢旱祠禱雨降  
歲則大熟又黎人作過巡尉祈禱雷

大作黎  
人驚散

勅某神僭耳在南海中黎人雜居厥田下下弭寇攘之  
患格豐登之祥惟神之功寬朕憂顧未加翟第闕孰甚

馬其正位小君以易二百年之稱謂尚憑寵命彌廣靈  
釐可

修製奉上冊寶主管所行遣書寫奏報文字承  
信卽權貨務檢法使臣王大亨轉一官減二  
年磨勘

勅具官某朕以八月戊寅上鴻名於西內惟時小吏與  
有刀筆之勞序進官榮毋忘報稱可

吉州進士易嘉謀進納米斛準錢八千貫補右

迪功卽

勅某人振稟佐軍一時之善意祿以馭之終身享其榮  
焉吾於士民可謂無負矣可

右修職郎監文思院下界魏欽緒用修製冊寶  
賞比類循三資

勅具官某朕奉寶冊於二親之側蓋曠典也維時慶賞  
徧速攸司議者疑焉故纔及考工之屬汝名臣子尤事  
有勞疊進其階尚知榮遇可



泇海制置使下進勇副尉多樂船部將翁喜弟  
紹興三十一年十月二十七日港口陣亡特  
贈承節郎與一子父職名更與一子進勇副

尉

勅某人向者海道之役人皆凱還而爾獨亡人皆策勲  
而爾無及錄孤進爵尚慰忠魂可

鎮江都統制張子蓋下探事人進義校尉霍千  
進武副尉呂直並在淄州淄縣陣亡各特贈

承節卽與一子父職名更與一名進勇副尉  
勅某人等謀而遇敵能格鬪以死斯亦忠矣追榮錄後  
尚克享之可

樞密行府忠義前軍於滌和壽州以來陣亡使  
臣守闕進義副尉李儀特贈承節卽與一子  
父職名更與一名進勇副尉白身李全特贈  
承節卽與一子進勇副尉無家屬李進等一  
十四人名特贈承節卽

十二月二十八日

物某人等敵人之道擾吾江淮爰命樞臣督兵以戰嗟  
爾死事是命追褒魂如有知尚或能享可

建昌軍忠節指揮兵士唐達丁達吳早武雄指  
揮兵士鄧明饒岳吳照鄧志昨起發赴江州  
駐劄前去壽春府陣亡各贈承節卽與一子

進勇副尉十一月二十八日

勅某人等國家平日養兵於諸郡所以待一旦之用也  
汝鄉繇出戍効死州來賜爵錄孤非特慰爾存沒亦庶

幾卒伍之衆知我無負於人可

將仕郎翟楷未有名目日克詳定一同勅令韓  
仲通書奏因紹興十九年六月進書得轉一

官資賞今循右從政郎

正月二十日

勅具官某前者判定章程爾以隸名應賞茲登仕版遂  
以畀之夫捨歲月之勞略薦舉之制而許進其秩序不  
亦榮幸乎尚思所以稱此者可

成閔保奏劉錡下紹興三十一年十月十三日

楚州淮陰縣清河口及十八里河口與金人  
見陣立功官兵又於十月二十六日揚州阜  
角林立功官兵右武大夫蘄州防禦使宋寧  
等轉官

宋寧賈和仲薛恩並三官吳超劉全劉端李  
進張俊田進王佐王宣邢福益遇並兩官韓  
貴四官韓章宋弁李平劉平李浚並一官於  
階官遙郡上分轉

勅金人十年謀我一旦掃國入寇惟帥錡抑其鋒於清  
河敗其衆於阜林勲雖未究而用力至矣具官某等咸  
負絕人之勇嘗攄敵愾之忠豈以錡亡而遺汝賞遞加  
爵秩寵錫贊書聞鼙鼓之聲猶思錡績申河山之誓用  
答汝功尚勉之哉毋忘予報可

左廸功郎御營宿衛使司準備差遣衛博結局  
轉兩官循左儒林郎

勅具官某爾以書生樂從軍旅之事固異夫懷安而不

武者第功幕府優進西階尚勵材猷以從官政可

右修職郎丹陽縣尉程千載栽埋鹿角暗椿自

建康至江陰界減二年磨勘循右從事郎

勅具官某佛狸窺江吾固知其送死然植柵以安民心  
有不可得而廢者汝為邑尉董治有勞稍進其階尚思  
報稱可

趙樽申忠義軍副統領戴規於紹興三十一年

十月內首先結約陳亨祖等收復陳州次年

三月番賊攻城初十日城破規部兵巷戰奪門陣亡特贈三官與兩資恩澤更與一名守

闕進義副尉

壬午十二月二十三日指揮

勅某人等宛丘之民世被王澤故得之也易城當四戰敵所必爭故守之也難爾智足以得其城而勇不忘而  
死守可謂忠矣追褒之典當越常彝魂如有知服予一人之寵命可

忠翊郎江西安撫司準備將領王士英有產業



在洪州本州通判吳謙舉覺先次住支請受  
本人妄狀經樞密院稱士英兼訓練日依奉  
朝廷指揮裁減諸廳人從追赴教閱吳謙因  
此嫌恨事吏部稱即無前件指揮檢詳者詳  
本人不遵分守特降一官放罷

壬午十二月十八日

勅具官某仕於殖產之邦雖戾吾法可恕也若乃矯誣  
而犯上議者疾夫削爾一階少戒妄發可

復州防禦使王友直海州解圍當轉三官特正

任觀察使

十月九日

勅觀風置使今雖異於古然恩章之厚待遇之優幾與  
吾侍從之臣等輕以授人可乎具官某葵藿之心惟思  
就日熊羆之力固可絕人東海奏功出乎倫類超進使  
號理亦宜之夫衛上莫若忠料敵莫若智率下莫若勇  
得士莫若公能是四者斯良將矣勉之哉毋荒弗朕命  
可

成閔下主管機宜文字宋藻已差知江陰軍用

荆襄功賞轉一官 壬午七月二十八日

勅具官某自兵興以來國家恤下至矣功戰者厚賞暴露者例遷爵秩所加動以萬計而襄漢之後閭謂汝實在行吾不疑也惟今有民有社殿最可考勉期增秩以自見馬可特授左朝奉郎

保義郎李嵩押川陝宣諭司御馬五十四匹準備馬一匹到闕轉一官減半年磨勘

勅具官某受馬於蜀而致之天閑可謂遠矣宜有以賞

之可

四川宣撫制置兩司保奏官屬趙不愚王序辰  
吳援朱良弼王昭辰張洵等往來計議邊事  
應辦錢糧撥遣軍器有勞並與轉官

勅具官某等朕知蜀將之賢可以蜀兵之強可用蜀塞  
之險可恃而念蜀民之獨困也西顧常閔閔焉道侯諸  
校能為吾却敵安邊既論功行賞矣士大夫參幕畫料  
丁壯督饋餼吾豈忘之哉其各進文階以應本約尚思

協贊而長外禦內撫使全蜀無虞三秦卒定則予一人  
以懌可

試中書舍人兼直學士院劉珙磨勘轉左朝散

郎

勅審官之法凡中外之臣率累歲月而遷焉况吾邇聯  
以言語侍從為職其助我多矣豈止一二計功哉具官  
某以精明開濟之姿藝文政事之才簪筆持橐事太上  
皇帝事朕積勞而不懈入直則擬大典冊鼓動天下退

朝則潤色名命與聞政幾用是進階可謂榮而無愧矣  
尚思詔祿彌務盡規可

德壽宮劉貴妃位醫官成全大夫李師堯依赦

轉兩官


仇師顏同詞

勅具官某爾以博習方書過籍西內斯亦幸矣有司稽  
用赦令優進官秩幸又甚焉勉稱其名毋墮而業可

武翼郎池州駐劄中軍統領趙思忠父端身故

特與起復

勅具官某邊鄙未寧朕方遣戍若時裨校豈容服喪爾  
其被堅執銳與士卒同甘苦庶幾得移孝為忠之誼而  
無衣錦食稻之嫌不亦善乎可



文忠集卷九十七

欽定四庫全書

集部  
文忠集卷九十八  
九

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>沈立銘



欽定四庫全書

文忠集卷九十八

掖垣類彙五

宋 周必大 撰

寧海軍承宣使提舉佑神觀邵諤父任忠州刺

史致仕希直特封成州團練使致仕

勅朕間朝西內親奉玉卮為父母壽然後信孟子之三  
樂而王天下不與存焉言念羣臣誰不知此其有保親  
之養者固當錫類以寵之具官某躬積善行而無過舉

力教其子謹愿有聞會朕纂圖溥覃慶澤佩以團兵之  
印增爾垂車之榮尚其欽承並介眉壽可

隨龍從義郎趙行依孫璫例除閤門祇候

勅具官某祖宗之世凡隸名上閤者皆書之冊其重如  
此近世用人衆矣朕欲稍遴其選而爾繇攀附得之非  
幸耶尚思共恪庶平以稱恩渥毋使人謂朕為私汝可

檢校少保安德軍節度使龍神衛四廂都指揮

使克鎮江府駐劄御前諸軍都統制張子蓋

守本職致仕 正月九日

勅我太上皇帝之中興也首命將臣俊整我六師經營  
四方勲臣王室象在雲臺始終無疵非明於知人能如  
是乎及倦于勤復起世將以授朕朕方倚之如長城特  
之如爪牙乃以病聞屢上印綬雖欲不聽其去不可得  
已具官其忠足以衛上庶足以服衆勇足以戡敵故分  
閫而師律振薄伐而重圍解志方馳於伊吾之北而病  
則止之嗟乎剪須可以已爾之疾吾弗靳也棄事可以

延爾之生吾弗強也汝往矣雖在里居毋忘我家之厚  
遇可

故張子蓋贈太尉

勅朕遭時多虞注意用武凡待爪牙之士皆如心膂之  
親而况紹興推轂之人循國克家之將驛傳訃告坐念  
涕流故具官某稟忠義於天資以功名為己任蠢茲北  
狄犯我胸山銜王命以暑行薄賊營而廩擊以天之道  
掃清蜂蟻之屯返旆而旋昭揭鱸醜之觀既成偉績彌

厲壯圖有整軍經武之志而未及施有犁穴焚庭之心而未及究何稟生之不淑遂寢疾而莫興是用峻升掌武之官加畀中金之賻馳恩而褒厥後定謚以表其勲萃此哀榮寄予震悼尚英魂之未泯聞休命以來祇可

太尉寧國軍節度使主管侍衛馬軍司公事李

顯忠封贈三代

登極恩赦

曾祖任皇城使贈太傅德明特贈太師

勅朕嗣服之三日需惠澤於天下文武之臣自通籍而

上皆得褒崇其父母至於遠及三世則不過二三執政與大夫將帥數人而已惟與之者甚吝故受之者至榮恩禮並施亦維其稱具官某躬稟義槩素多陰功肆其曾孫名位光顯屢惟愍典資于幽阡茲頒慶條遂冠槐位國家非常之寵爾尚歆享之哉可

故曾祖母楚國夫人野氏特贈秦國夫人

勅朕以涼菲之資荷太上付託之重方賴中外將臣竭力以濟吾事眷其先世延以襪章是惟施惠於前蓋將

責報於後也具封某氏飭已正潔成家儉勤啟相後人  
位升掌武會逢大慶加畀異恩徙封三秦實邇故里靈  
如未泯其必知榮可

故祖任供備庫使贈太師中言特追封和國公  
勅傳稱祭從先祖此言施于三代可也本朝待群臣則  
不然一用其子孫必爵其父祖蓋有加而無已也故夫  
廟室之制籩豆之數前以士而後以公卿者多矣而又  
何從焉禮遇優隆自我作古具官某材氣豪邁稟于令

方積善有貽再世而大屢頒渙渥發爾幽光茲以維師  
之官而賜諸公之履非特寵綏李氏亦使凡為人孫者  
皆以念祖為心而自勉於功名不其休哉可

故祖母魯國夫人析氏特贈魏國夫人

勑婦人之譽生猶不出於相况百年之後墓木已拱則  
夫遺芳懿行何自而發聞於世哉然視其子孫之昌或  
可知閨門之教追褒甚渥不在斯乎具封某氏蘊德靜  
專齊家肅敬流光著姓鍾慶後人位正小君其已久矣



魯大國也今朕猶以為褊而徙之魏魏吾故疆也爾尚  
陰相顯忠使助成恢復則山川土田雖不及爾湯沐之  
奉獨不可真食以助其蒸嘗乎可

故父任同州觀察使贈太師追封衛國公永奇  
追封楚國公

勅朕祇紹慶基日奉榮養恩與四海共此慶澤故生者  
遷沒者贈雖踈遠小臣無遺矣况乎司萬騎于內付三  
軍于外班在尉府權重節鉞貴寵如此豈復靳殊恩于

其禰廟乎具官某負沉鷲之材而不忘肅恭積功戰之  
勞而不忘殺戮所蓄既孕利其嗣人屢以追褒躋登一  
品茲繇康叔之地改昨南荆之區非特廣朕漏泉之仁  
抑亦表爾教忠之効尚有知也其克享之可

故母越國夫人拓跋氏繼母周國夫人蒙氏並  
特贈楚國夫人

勅邦君之妻曰夫人古今一也朕既推御極之恩徹全  
楚之壤以追寵將臣之父矣顧何愛小君之號而不以

加責其母乎具封某氏黽勉婦儀修明閭政幸哉有子  
為國虎臣高官厚祿所以酬扞城之功密郡襁章所以  
成顯親之孝疏寵久荒於大國從夫載啓於南邦綸帑  
告幽顧增光之未已廟劔致享尚垂裕於方來可

妻平陽郡夫人周氏特封安康郡夫人

勅朕觀鵲巢之居詩紀榮盛牛衣之泣史憫厄窮乃知  
婦人之貴賤貧富雖係其夫然亦有命存焉具封某氏  
天賦柔嘉歸逢昌熾副笄以處翟茀以朝外命婦至于

如此亦可以為榮矣惟郡國之小大故有次第茲予踐  
阼廣爾脂田顧顯忠方提兵於外未遑內理家事也爾  
其均鳩鳩之德共蘋藻之祭使爾夫一意以成偉績則  
朕所以寵其室家者豈有既乎可

太尉吳蓋獻錢五萬貫與男忠訓即吳玠轉一

官

勅具官某太上皇克儉於家於戚里未有好賜也日吾  
叔舅反歸貨以贍國不亦難乎命爾遷官尚知所自可

節度使同知大宗正事士街贈少師追封咸義

郡王

勅自諸姬既衰言宗室則予兩漢然秉德如間平者財  
十三而荒淫顛覆相屬也本朝以隆名厚祿優待近屬  
而不敢以事委焉惟擇年高德劭者付以糾合宗盟之  
任故生也尊榮無玷歿也保其令名軼漢從周世守勿  
墜故具官某肇功流慶實自濮園維祖維父咸啓王社  
貴而能降富而不溢授以司宗之印有年於茲奄終壽

考朕用痛悼既詔太僕輟視朝之儀服以絺冕王紱告於而第哀榮備矣尚克享之可

張子蓋按發護聖軍正將權李寶軍統制官武功大夫吉州刺史符鎮擅離屯所契勘得即非擅離止是不曾備坐出戍軍馬歸休指揮申鎮江都統特降一官

勅具官某以卑抗尊詞直且不可況未必直乎爾雖奉詔班師而不以告示統帥是亦罪也特薄耳故吾亦薄

罰之可特降授武顯大夫

左朝奉郎通判南安軍陳秉直躬親部兵捕獲

兇賊鄧五十九等全火六十餘人特轉兩官

勅具官某郡有丞掌兵馬古制也汝居其官而能設方畧獲群盜是亦職耳何以賞為顧今媮懦之風勝吏之失職者多有如汝功誠不可廢優進厥秩其益勉之可

犯賊除名人前成忠郎趙忠寄居南安軍諸知

地里說諭賊寨傍百姓不敢從賊并獲正賊

四名特與叙承信郎

勅某人南方多盜以姦氓為之地也汝繇廢處知賊根株既止合從不獲何待有司言狀稍復故官尚勵廉勤朕方便過可

忠翊郎南安軍兵馬監押武成同巡尉獲賊徒  
特與轉一官

勅具官某護戎一郡充位而已矣今汝獨能搏執寇賊其功可嘉命進一官以為任職之勸可



右奉議郎湖州德清縣丞張蕃降一官

勅具官某傍郡獄疑命爾鞠之坐踰再旬迺復規免爾  
固懷安矣獨不念桁楊之繫為可憫乎削議郎之秩以  
戒慢公而避事者可

先化軍鄴侯德懷廟特封助順文終侯

督視軍馬注敵

保奏紹興三十一年九月二十七日敵入光  
化夜有鹿衝并船筏渡江風吹着淺諸軍因  
而獲捷并傳敵見甲  
騎與廟像一同事

勅某神始完顏氏之修好也質之天地告于鬼神曰渝

此盟罔克祚國金人恃強怙勢舉成言而棄之天既降  
威以勦絕其命凡敵師所次神則致殛惟鄴城在襄漢  
間相國何之舊邦也聲施後世威靈赫然却敵安邊法  
應祀典茲用不改漢謚而麗以助順之名將使五戎六  
狄知得道者多助違天者不祥而常以彼為監云可

保義郎衛百揆父經九年九十三歲紹興三十  
一年九月二日明堂赦補保義郎致仕

勅某人三代省方之制久廢不誨未暇接見高年也故

國家每肆大肯必出爵以禮之是亦古之遺意歟有司  
言爾子在官爾年應格故推宗祀之慶而以一命加焉  
徃祇寵榮尚保終吉可

建寧軍節度使提舉江州太平興國天水郡開  
國公士剽贈少師追封咸安郡王

勅朕觀安懿諸孫蕃衍奕世高旌巨節相望於本朝王  
紱公主交屏於帝室寔維前人積行累功之効豈獨列  
聖庸勲暱近之恩施及眇冲敢忘敷叙天不遺於族老禮

宜厚於閔章故具官某襲慶仙源承休近屬向以宗英  
司闕齊于外晚由祠館奉朝請于中被疾久之于今已  
矣惟亞師於官為甚重惟諸王於爵為甚尊併用追褒  
少紓悼念夫明德所以親族尊祖在乎敬宗哀榮之間  
恩義斯稱尚英靈之未泯聞櫨以來歆可

保義郎蔣州期思縣尉趙晟部領進義校尉劉  
瑜與群賊黃軍二等鬪敵身亡晟贈兩官與

一資恩澤瑜贈承信郎與一子進義副尉

二月二日

勅具官某等盜發期思汝能死職進官錄後少慰忠魂  
可

量試宗子合格二百六人內趙汝弼補承節郎  
餘並補承信郎合格雜犯附榜人趙師厚等

一十人亦補承信郎展二年出官

二月十七日

勅某人等太上皇親璽綬授朕日承慈訓常懼德之  
弗嗣永惟明俊德以親九族雖唐堯不敢後也故首下  
量試之令以官支庶而爾等各負文藝應有司之格其

錫一命使從官政子夏曰仕而優則學學固無窮也毋以既仕而遂自止焉可

蘄州防禦使浙西副總秀州駐劄郭振除宜州

觀察使差遣如故

勅朕當饋而患無頗牧故創為十科下之有司凡秩觀風而上者許以所知三人薦于朝蓋將廣拔擢之路也若捨舊將而未用豈稱皇皇求索之意哉具官某智略果毅有聞于時趣對便朝察其可用故不待勲効而先

以異恩加焉朕方愛惜名器砥礪天下尺寸之遷不輕  
予人今獨超拜爾之爵秩者非以其可與共功名耶尚  
勉忠圖勿辜異眷可

泉州同安縣廣利廟靜應威顯侯加封靜應威

顯昭護侯贊佑夫人加封贊佑敷惠夫人

累因

盜賊侵犯邑人迎神入市靈應甚多遂保無虞

勅某神自古盜賊凶荒有非人力所能獨弭者故凡郡  
縣之間天必鎮以靈祠使視其不祥而被除焉此利澤

所以周施災害所以不作也瞻言巖邑有赫北山廟食  
肇於唐餘封爵加於昭代暨乎近歲肸鬻彌張朕既嘉  
爾侯有庇民之功復眷厥配有贊成之助稽叅故實  
增衍嘉名尚其内外交飭益著顯效以圖稱上帝分命  
百神之意可

舒州宿松縣小孤山惠濟廟聖母已封安濟夫  
人連年調發軍馬津運錢糧及舟楫經涉江  
湖軍民逐時祈禱皆有靈應加封助順安濟



夫人 十月十日

勅某神書曰至誠感神矧茲有苗乃者犬戎盜邊江淮  
雲擾而兵民利涉漕運無虞迄憑天誅醜類自北此神  
母之陰相而太上之聖德也予一人方承厥志經理中  
原相彼叢祠屹臨衝要縣用加崇位號贊以書命庶幾  
因報功之典而徼福焉可

建寧軍節度使士剴遺表男忠訓即不尅乞依  
士太男換文資特換右承奉郎 正月三十日

勅具官某祖宗時以儒科易武弁者多矣近世一切反之將門戚里朱紫蓋相望也豈於吾宗室之老獨有所靳而不徇其遺言乎真爾東班尚識朕親親之意可

知內庫齊安郡夫人奏主管文字承信郎劉澤

轉一官

勅具官某內命婦至於掌宮中之財啟湯沐之邑則其更事多宦勞久矣遺占有請其忍弗從進階之榮遂及府史尚思幸得勤於在官可

武翼卽劉績除閤門宣贊舍人

勅具官某故事官介諸使則解贊導之職惟寔隸上閤  
與夫顯立戰功者不奪焉爾嘗有牧圉之勞茲用寵之  
申命尚圖後効以答新恩可

從義卽江淮宣撫司提轄衙兵王寔招募神効

軍効用特轉一官 十二月二十五日

勅具官某朕觀方叔元老克壯其猷然其車三千亦賴  
新田之士今吾樞臣集萬弩於江表而為征伐擬執之

計視詩采芑異世同符茲覽奏章正厯下募兵之賞進  
官一等等用答爾勞可

武功大夫馬軍司左軍統領董遇供職滿十年

無過犯轉一官與遙郡刺史 二月四日

勅具官某爾為隊帥十閱歲華有統督之勤無曠瘵之  
咎肆稽功令榮假郡章朕方捐爵賞以待殊勲爾勿累  
年勞而應常格可

成閔御軍無律贖貨多私可落太尉在外官祠

婺州居住 二月十八日

勅共惟太上皇帝德威聖武大足以駕馭豪傑小足以  
照臨將士故環列之尹克位可也朕以眇躬初陟元后  
正賴熊羆之士戮力一心內肅機樞外攘戎狄若祈父  
官非其人則小雅之刺興矣廢以馭罪惡可緩乎具官  
某奮身單微受國恩寵向為列校猶知趨事赴功冀幸  
爵賞及志滿意得遽負使令議者適其過愆多至數十  
雖更赦勿治而不可恕者二焉蓋朕日御便殿厲師講

武別勇怯齊部位爾則馭軍無律咈朕之心朕儉於奉已優於勞軍屢詔將臣剝下毋貪利非公事毋輒役一卒爾則黷貨多私干朕之法此而姑息後復誰懲雖從罷免未塞輿議尉安之府非爾宜居其以外祠屏居近郡夫御將之道賞與罰而已賞當功則人勸朕無吝也罰當罪則人畏閔自取焉因著厥辜用儆有位可

中衛大夫權發遣淮南西路兵馬副都監御前  
後軍統制頓遇陳乞淮西戰功并暴露賞及

覃恩乞依孔福例陞帶遙郡特轉遙郡刺史  
勅殿廷之班橫階為貴又況益以諸侯之組豈不為將  
臣之膺仕乎具官某勇可翹關忠能敵愾日緣苦戰身  
被重創幕府第一功已加殊獎茲念宣勞之久且覃續  
服之恩升刺大州特為異數邊虞未靖爾尚勉哉可

吳璘奏收復秦州擁上城人各轉兩官數內將

官左武大夫曹建轉拱衛大夫 二月三日

勅具官某異時秦亭控扼西陲號為大府中罹寇亂城

郭非其故矣然蜀師得之可為保障之助此吾大將所以必取也其官某稟承方略奮發勇功螿弧既登雉堞隨陷因其版授進以橫階祇服異恩愈思自竭可

右武大夫御前中軍第七正將許章部押招撫  
及捉獲敵兵一百一人并家小五百九十三

人到行在轉一官 二月五日

勅古者諸侯有四夷之功則獻於王今吾西師遠効戎捷或降或執旅百於庭得春秋之誼朕甚嘉之其官某



受命轅門歸俘魏闕舟車萬里寒暑踰時寵進衡階用  
酬勞勩歸語爾帥為我擒頡利而致之可

親衛大夫常德軍承宣使主管建康府御前諸  
軍統制職事邵宏淵繳納逃亡事故人功賞  
告劄一千五百一道與除正任觀察使

勅功疑惟重蓋急於勸勞令出惟行固難於逆詐若乃  
績弗成而思闕昔雖在而寔亡微良將言焉則吾賞僭  
矣具官某竒龐福艾沉鷲闕雄比提偏師獨控六合有

嘉宣力姑試統軍乃于人誕謾成風之時首為忠忱體國之計畫以虛籍上之司勳謂六國之印當銷而王成之侯或偽助吾責寔賴爾不欺將寓意于勸懲特正名於庶訪申加寵命仍畀帥權夫兵稱少多精則可用賞無厚薄當則為榮尚因見知善御而衆可特授廣州觀察使

右朝奉郎新除祕閣修撰知閬州吳

犯御名

用前

任四川宣撫使主管書寫幾宜文字功賞轉

兩官

勅具官某爾父功在秦蜀朕心不忘命爾來朝曾未閱月而卿侍郎省許之踐更龜紫文階錫命稠疊進封之寵至下及其室家猶以為未也升之論譔之華付之蕃宣之寄茲稽功狀復畀兩官自朕嗣位推恩文武亦有如是之速且厚者乎歸拜親庭備言朕眷若夫忠孝在爾勉焉可

故武翼大夫秦州兵馬都監趙輻特贈兩官與

致仕恩

勅具官某敵犯海陵爾捐軀隕命名編死事家被賞延庶幾有知歆我恤典可

秉義郎韓敏特贈三官與三資恩澤進武校尉耿興下班祇應許進進義副尉鄭旺守闕進義副尉張福守闕進勇副尉崔謹劉進並贈承節郎與一子父職名更與一名進勇副尉並於今年正月二十在臨淮縣北曹家庄陣

亡 癸未

勅某人等邊郡之士敵至而戰固其職也抑朕不德無以格強敵使汝曹肝腦塗地如惜怛何進秩錄孤其無憾於泉窆可

武節即成都府等路第一副將嘉州駐劄鄭祥  
承節即嘉州隸為縣尉胡欽若降授保義郎  
嘉眉州巡檢王忠各贈兩官與一資恩澤下  
班祇應成都府等路第一隊將嘉州駐劄王

彥贈承信郎與一子父職名並於紹興三十一年十一月在捷為縣馬回山下與作過蠻

人闕敵陣亡推恩

癸未二月三日指揮

勅具官某等夜郎僰中之蠻侵擾縣道爾等觸白刃冒流矢以盡人臣之節朕聞而傷之優進厥官賞延于世忠魂未泯尚知享哉可

吳璘軍統領官武功大夫王玠轉行右武大夫勅西閣置使武階之高選也非有偉績不輕授人具官

某報國惟忠臨陳則勇于堡之役傷甚而氣不衰卒成  
厥功威震強敵其遷進秩以勸三軍尚體異恩益思奮  
勵可

前執政某人落職饒州居住

勅大臣法所以責小臣之廉表民在此前車覆所以為  
後車之誡貳過可乎雖欲廢於官刑顧難違於公論具  
官某頃陪帷幄命使江淮軍旅借曰未聞簞簋豈容不  
飾庶威奪貨魚罔念於吉人盜器為姦忍自同於凶德

惟處心之甚拙何決勝之能知旋繇臺諫之交攻聽解  
樞機而善去而乃尤悔復聞罪讐并案子孫貪墨不知  
遺楊震之清宗族憑依乃敢恣灌夫之橫宜絕殿帷之  
籍俾遷江介之居噫禮義廉恥以遇其臣朕固當存于  
恩意節儉正直而化在位爾寧不體于忱誠尚懲既往  
之愆思保有終之吉可

前執政子右承直郎某特降一資勒令隨侍

三月

七日



勅具官某有司言爾貪暴有狀既累乃父矣於爾安乎  
少賸祿秩徃奉詩禮之訓夫惟家有嚴君爾必不戾吾  
法父有爭子舊弼豈遽貶哉毋尤人各思其過可

武顯大夫御前軍同統制軍馬鄭思廉紹興前  
三十二年五月六日解圍原州陣亡特贈六  
官與六資恩澤合贈拱衛大夫遙郡團練使

二月二十五日

勅春秋貴偏戰初不以成敗計也况能捐軀殉國而可

無寢乎真官某久在兵間見稱膽略原州之役視死如  
歸朕惟廐焚猶恐傷人忠厚思及行葦今聞爾訃痛悼  
可知盡錄孤兒峻加勇爵魂兮如在尚識我心可

起復武功大夫范旺王順武功大夫胡成李玘

並特轉遙郡刺史翊衛大夫利州觀察使劉

銳特轉親衛大夫右武大夫果州團練使秦

祐特轉式武大夫

十二月二十五日

勅向者敵窺襄漢涉淮泗吾士卒敵王所愾競欲先登

而大將閔智不足以料敵恩不足以撫下使爾具官某等有奔走之勤而失恢復之機朕甚惜之雖然故疆無虞邊邑略定衆服勞而不怨則偏裨預有力焉其越邦彛賜之一轉或橫班彌峻或郡紱甚華勉圖雋功以遂

闕

忠翊卽閭門祇候孫德敷武卽劉廣並為押馬  
綱倒斃三十匹各降一官展磨勘一年

勅具官某等百金市駿骨設喻以求賢也若真質馬而

道斃之豈不傷財之事乎其詔貶秩如律可

右從事即國大同循右儒林郎

勅具官某前歲閔以吾兵環荆襄陳蔡之郊閱時甚久見功甚寡然不廢吏士之賞者所以憫其勞也例遷爾秩尚識朕恩可

楊亨轉遥郡刺史

亨係供內儀鸞御前祇應御前忠佐馬步軍副都軍頭該

德壽官轉兩資內一資于見今職名上轉行合轉御前忠佐馬步軍都軍頭係礙止法為係随太上皇帝龍興時一般随龍李進例轉行遙刺請給等並依李進例支破依舊本官

抵應

勅具官某周以下士為幕人所以重其事也况汝早共  
帷幄攀附太上比案赦令冠忠佐六資之例恩猶未已  
遙界郡童廩給加優復從近比徒以奉事吾親之舊故  
於名器不敢愛焉上識朕心益勤乃職可

歸正人營燹補承信郎

勅某人爾父捨逆歸順不幸功未究而繼以死錄孤之  
澤踰二十年雖阻隔畿疆而王命不墜茲能自拔申界

前恩勿忘父冤尚勉國事可

貸命自効人前拱衛大夫文州刺史韓霖叙復

修武郎

二月六日

勅某人將而避敵在法當誅裁免汝官國恩甚厚蒙城  
之役焚敵芻糧既非雋功豈足贖過姑繇大賚稍復崇  
班念我再生之恩毋忘九殞之報可

殿前司正將武功郎張珣昨提舉巡警言德壽宮

依赦轉兩官

勅具官某朕愛惜爵賞以待有功惟給事親側則無所  
靳爾嘗率其旅徼巡周廬例進兩官尚知榮遇可

昭化軍節度使嗣濮王士輅女夫司公度除閭

門祗候

勅某人傳曰厚於仁者薄於義厚於義者薄於仁念我  
宗英老而無子間因賜對為壻求官本之人情寵以華  
職睦族固為仁美合宜獨非義乎厚薄之分朕所不取  
可

文忠集卷九十八



欽定四庫全書

文忠集卷九十九

掖垣類藁六

宋 周必大 撰

駁前餘杭縣知縣蔣安定改正罪名狀

時暫權  
給事中

具位臣周某準中書門下省送到錄黃一道為九月八日奉聖旨蔣安定元斷徒三年贓罪及絞刑贓罪并特貸命追毀出身以來告勅文字除名勒停送潯州編管並特與改正所有籍沒家財緣年歲深遠難以給還事

令臣書讀行下須至奏聞者右臣竊惟國家比設薦舉  
縣令之法蓋以職在近民所當重也然廉平之政終無  
聞於世者非以懲惡未至耶按蔣安定身為畿令而敢  
姦賊狼籍畧無忌憚置女僕求乳媪私事也既盜公家  
之錢以償其直又抑勒手分保正以助之至于侵牟舖  
戶虧損銀價殆及一百七十餘千凡買書籍饋過客取  
諸官帑如探私篋總計其數至六百緡事發之後乃牒  
縣以職田撥還罪狀如此已經伏辨而謂之賊證未明可

乎况法闕定斷之後未嘗再鞫若徑許改正自今以往  
凡居官嗜利者何憚而不清晝攫金哉且祝當無罪乃  
疑其為盜而掠死之禁繫孫福至使自刎人命至重曾  
不加恤其殘酷甚矣違法置收支之歷欲折折之欲毀  
毀之一切任意其不遵法令甚矣貸命流竄理亦宜然  
累赦之後忽求叙雪此何意也况刑部申省改正乃在  
三十年八月經隔二年有餘方與取旨則是朝廷已知  
前日定斷之為允故疑之也若謂近經大需則叙復自

有常法付之有司足矣何必因其自陳而廢格已行之  
命啟僥倖之門乎臣愚竊欲望睿慈將上件改正指揮  
特賜寢罷庶幾貪吏稍知戒焉所有錄黃臣未敢書讀  
謹隨狀繳進以聞伏候勅旨

九月十三日三省同奉聖  
旨依奏前降指揮更不施

行

論婉容翟氏位官吏礙止法人轉行狀

同金安  
節

給事中金某權中書舍人周某狀奏準中書門下省送  
到錄黃一道為婉容翟氏進封本位官吏並合推恩內

礙止法人特與轉行令臣等書讀須至奏聞者右臣等  
聞勲績著則品秩崇品秩崇則恩數厚故凡文武官之  
平進者皆為法以止之不可踰也近者太上皇帝推扈  
從之賞陛下施登極之恩可謂事大體重矣然其間有  
法當回授者未嘗轉行豈容掖廷奉事之人獨越此例  
其數雖微其源不可啟也臣等欲望聖慈將上件礙止  
法人特與轉行指揮速賜寢罷所有錄黃臣等未敢書  
讀謹隨狀繳進以聞伏候勅旨

九月二十九日三省同  
奉聖旨依奏賢妃姪容

位官吏轉官礙止  
法人並依條回授

紹興三十二年九月己未某兼西掖之二月有旨婉容翟氏進封本位官吏並合推恩內礙止法人特與轉行是時給舍例同銜繳駁某密語安節妃嬪位非中宮即醫流皆礙止法前德壽推江上扈從賞今上覃恩並不轉行止令回授似當論奏安節嘆曰君言是也近夏賢妃位推恩安節寔未曉已書讀行下今恐相戾君自繳奏可也某曰若爾尚可商量庚申講

筵安節與某各以職事先後留身初不知安節奏何  
事某侍班廷下望見安節再拜殿上安節退而某升  
甫至榻前上迎勞云朕初止謂卿能文適金安節說  
卿欲論婉容位轉行礙止法事不謂卿剛方如此可  
便進文字來方晤安節自引前事以為失也章既上  
御批十三字云依奏夏妃位官吏亦令依條回授此  
舉上可彰聖主從諫如流之德下亦著安節事君不欺  
之義他日史氏或有考焉

繳李觀鄭孝禮轉官詞頭狀 十月七日上

具位臣周某准中書門下省送到詞頭一道為李觀鄭孝禮等依隨龍人例轉三官事令臣書行須至奏聞者右臣聞法者萬世之當守例者一時之所行近日之弊正在于用例破法故每開一例則轉相攀援無有窮已槩之成法背戾多矣今李觀鄭孝禮等自陳遭遇除皇子立皇太子皇帝登寶位係在潛邸遂許依隨龍人例減半推恩臣竊疑焉使觀等果隨龍耶則當盡與恩數不



應減半使其非隨龍耶則凡小事不可用常例孰謂隨龍而可以為例乎臣愚欲望聖慈明詔有司取具觀等元係潛邸是何職任係與不係隨龍正其名而與之庶幾上無僭賞下無虛受用例之弊自今得以少革亦助治之一端也所有詞頭臣未敢書行謹錄奏聞伏候勅

旨

十月十四日三省同奉聖旨李觀等正係隨龍人為義祇應已減半推恩可依已降指揮施行

繳士恭用減年轉官狀

十月九日上

具位臣周某準中書門下省送到詞頭一道為皇叔蘄

州防禦使士恭可用恩平郡王璩減年磨勘轉官事令  
臣書行須至奏聞者右臣竊見南班正任十年一轉須  
用寔歷初無回授之法又宗官歲得減年依條許與子  
孫遙郡刺史以下闕使陛下初承大統動遵成憲如士  
恭磨勘有不可者二焉以尊卑論之於恩平郡王璩寔  
視叔祖今乃用姪孫減年於法為不合於體為不順一  
也法許用之於遙郡刺史以下今乃施之於正任防禦  
使以上相去遼絕何翅冠履二也止緣近日士峴士歆

士程等皆因兄弟陳乞一例與之故習熟見聞以為當得朝廷既不以為過受者亦不以為恩臣恐祖宗舊法日益隳壞甚可惜也臣愚欲望特降睿旨追寢前命仍詔大宗正司自今於法有礙者毋得循例申請雖得指揮亦許吏部執奏不行其間宗室或有行藝顯著操履不羣者自可據其寔狀保明聞奏陛下特與遷轉以示敦睦激勸之指則於人情法意兩得之蓋爵祿自上出則善者厲名器不輕假則僥倖息臣之所論非為一士

恭也惟陛下圖之所有詞頭臣未敢書行謹錄奏聞伏

候勅旨

十月十七日三省  
同奉聖旨依奏

繳王夫人位手分狀 十一月十一日上

具位臣周某準中書門下省送到錄黃一道十月二十  
九日奉聖旨崇國柔明淑美和懿王夫人位手分強興  
祖罷本位差錢塘縣貼書黃世賢填手分強興祖名闕  
祇應請給並依強興祖則例支破令臣書行須至奏聞  
者右臣竊惟人主命令朝出於九重夕布於百司一有

非宜為累至大今崇國夫人位遷補胥吏瑣尾甚矣若  
因本位陳乞令有司與之無不可者何至煩御寶於內  
而降錄黃於外使四方聞之謂勅差錢塘縣貼書無乃  
有傷國體乎蓋緣禁中文書至多陛下無由詳察若因  
臣言即賜追寢則自今以往無敢以猥未上瀆聖聰者  
矣所有錄黃臣未敢書行謹錄奏聞伏候勅旨

十一月三日

省同奉聖旨依奏前  
降指揮更不施行

繳駁蔡仍叙官狀

十一月二十一日  
同日同金給事

具位臣金某具位臣周某準中書門下省送到錄黃一道為前左朝散大夫賜紫金魚袋蔡仍依赦復元官事今臣等書讀須至奏聞者右臣等聞孔子之言曰赦小過又曰周有大賚善人是富若乃生則迷國不道沒則流禍無窮其子孫豈可下同小過而例霑大賚之恩乎按蔡卞陰賊險巧遠出京右紹聖以來挾紹述之說濟姦欺之寔履霜失戒馴致堅冰此邦之讐民之賊也今若使其子得以赦原復正即位則宿姦巨蠹之後皆可

復齒仕籍失政刑矣惟陛下明詔有司毋泥文而啟姦  
庶幾為惡者稍知懼焉所有錄黃臣等未敢書讀謹隨  
狀繳進以聞伏候勅旨

十一月二十二日三省同奉聖  
旨依奏蔡仍叙官指揮更不施行

繳曹峽等轉官狀

十二月三十日上

具位臣周某準中書門下省送到詞頭一道為京東東  
路招討使李寶申昨膠西及海州與金人見陣數內左  
從政即主管羽檄軍書文字曹峽乞優異推恩奉聖旨

特與改合入官仍更轉兩官吏部稱已改宣教郎今來  
合轉左承議郎右楊存中申御營宿衛使司一行官屬  
等防托江面並依葉義問等例推賞數內左迪功郎衛  
博右迪功郎陳瑄各轉兩官考功稱未有考第合循四  
資吏部勘與會比類軍功捕盜格衛博將一官改轉左  
承奉郎陳瑄將一官改轉右承務郎令臣書行須至奏  
聞者右臣竊謂軍興以來功賞冒濫固多矣然以戰鬪  
為辭真偽猶難辨也至如一介書生偶從辟召則其智



畧之深淺才力之勇怯最為易見今乃或以貨結大將  
或以力脅有司夤緣僥倖驟進官簿儻置而不論則庶  
恥哀矣按曹叅以財雄於江陰方李寶膠西之捷蓋潛  
師涉險所致曾何羽檄軍書之有叅既用此為名特改  
左宣教郎已過所望若更轉兩官不太甚乎此臣所謂  
以貨結大將者也衛博陳瑄並為宿衛使司準備差遣  
閱日甚淺勞効可見結局之日皆轉兩官當時特用樞  
密行府例依條施行賞非不厚而考功檢照二人全無

考第當循四資吏部輒引葉義問績取到特與改轉指  
揮曲為申明遂致朝廷亦與比類軍功捕盜格此臣所  
謂以力脅有司者也夫考績必計歲月改秩專用資歷  
若因賂而授以計而得將何以勸有功之士塞無厭之  
求乎臣愚欲望睿慈特寢曹岷更轉兩官指揮其衛博  
陳瑄止令依格循資庶幾少抑僥倖上裨總核之政所  
有闕

繳別廟用樂狀

十二月十一日上

具位臣周某準中書門下省送到錄黃一道為將來追冊王后祔享太廟合依見今薦享別廟懿節皇后禮例用樂行事內導引儀仗鼓吹今欲乞備而不作事令臣書行湏至奏聞者右臣竊惟薦享宗廟為祖宗也故以大包小雖別廟無嫌於用樂今祔廟之禮專為安穆皇后也豈可為薦享同日而語哉竊見禮官申請尚有未盡臣愚欲乞將來安穆皇后神主至太廟祔謁諸室用樂舞行事外所有別廟奉安之際則乞備樂而不作蓋

用于前殿是不以欽宗之服而廢祖宗之禮也停於別廟是懿節皇后安穆皇后為欽宗服制未畢而少屈也如此則於禮為順于義為允所有錄黃臣未敢書行謹錄奏聞伏候勅旨

闕

臣竊見昨來德壽宮奉上冊

寶不惟仰事君親兼亦係是嘉禮然猶不欲作樂則于

今日尤當別嫌伏乞睿照

十二月三十日三省同奉聖旨依奏

繳高克咨轉官不當狀

十二月十四日上

具位臣周某準中書門下省送到詞頭一道為無為軍

巢縣知縣高克容措置召募萬弩効用轉一官本軍通判王濩與減二年磨勘縣尉張覺民減二年磨勘令臣書行瀆至奏聞者右臣契勘江淮宣撫使元申請萬弩營推賞指揮節文兩淮知縣勸諭土人闕或寄居使臣等自能召募及百人白身補下班祇應有官人轉兩官其知縣能率先勸誘就緒亦為保奏推賞昨於今年九月內使臣楊信自借兌錢物招到八十六人遂得轉一官減二年磨勘此則應自能召募之賞也是月盱眙招

信兩縣催促勸誘招及百人各減二年磨勘此則應率  
先勸誘之賞也今無為軍巢縣止之盱眙係近裏州軍  
高克容雖名為躬親措置募到一百三人其寔以縣道  
事力委之公吏分頭辦集甚不為難比之自能召募者  
萬萬不侔只合依盱眙招信體例作勸誘就緒共減磨  
勘二年今乃用土人自行召募之賞遂以兩官分界三  
人則與元初指揮寔為背戾欲望睿慈付有司檢照上  
件事理速與改正庶得允當所有詞頭臣未敢書行謹

錄奏聞伏候勅旨

十二月十七日三省同奉聖旨依奏

申省論朱霖狀

準中書門下省戶房送到詞頭一道為朱霖進納補官事尋照紹興三十一年元降獻助指揮係令知通認數交納依第第保明申轉運司審寔擬定合補官資先給公據後來雖有三十二年十二月二十六日都省劄子據憑陳乞文狀先次放行亦謂已納錢之人而吏戶部非理取會行遣留滯者今來契勘本人願獻錢八千

貫方且告示送納即是未曾齊足兼大理寺既省詳本人因與外甥情涉從杖一百科斷雖不錄聞既非枉被刑責難以補授文資并吏部擬本人前銜稱鄉貢進士據元狀只稱係州學生緣此未敢命詞湏至申聞者右謹具申中書門下省乞下所屬更切契勘施行仍乞于今年十月二十六日都省指揮劄子內添入已得納錢公據方許陳乞推恩一節庶幾不至冒濫

繳張宏特支請給奏狀

正月十二日上



右臣準中書門下省送到錄黃一道正月九日三省同  
奉聖旨殿前指揮使左班都虞候榮州刺史押行門奏  
萬福祇應張宏可特與支破帶遙郡請給者右臣伏聞  
仁宗皇帝時屢下詔書推劾干請內降之罪嘉祐二年  
鎮海軍節度觀察留後李璋用此轉官為諫官陳升之  
劾奏罰銅三十觔著在國史永以為憲近者陛下命羣  
臣條陳時弊其間多以此事為言竊謂聖明必賜裁擇  
今檢照張宏特支遙郡請給事因既非御筆又非寶批

止用白劄子而已臣不知此命何自而出幸付三省尚  
可進呈設若指揮百司亦用方寸之紙奉行則難辨真  
偽不行則輕損命令甚為陛下惜之况宏一班直之長  
耳去秋已嘗特支全分請給緣戶部執奏而止今纔數  
月乃復黃緣請託紊煩天聽比之李璋貴賤殊絕尤不  
可以無懲也臣愚欲望聖慈收還前詔仍用仁祖故事  
將宏量加責罰以示四方以為後戒所有錄黃臣未敢  
書行謹錄奏聞伏候勅旨

請早開講奏

二月七日上

右臣今月六日伏見中書門下省錄黃奉聖旨開講用  
三月十一日者恭惟陛下聖質天成道學日就固不待  
分章摘句乃能多聞而有獲也然學之為王者事其已  
久矣國朝開講之制昔以二月上旬今乃遠用三月十  
一日非獨距住講之期至近其間復有休假及詣德壽  
宮日分則是半歲之間講讀不過十餘日而已以陛下  
勤於治道咨詢無倦而又收召豪傑並置經幄彼皆日

夜望賜清閒之燕致緝熙之助若緩其所當急而使講  
藝論道之風稍缺於初政甚不可也臣更不敢繳奏已  
行之命欲乞睿慈依去年秋講例直降聖旨特就近於  
二月中旬擇日庶幾中外曉然知陛下汲汲皇皇如古  
之聖人且於祖宗開講之制不悖臣不勝惓惓惟聖明  
裁幸謹錄奏聞謹奏

繳道童度牒狀

具位臣周某準中書門下省送到錄黃一道尚書省送

到禮部狀準紹興三十二年十月二十七日勅奉聖旨  
紹興三十二年會慶節太乙宮道童陳定一秦混一陳  
言一並與依例特賜度牒披戴本部勘會新法綾紙度  
牒依指揮臣寮恩例及試經撥放并給降支使等並依  
已降指揮住給雖奉特旨令禮部執奏不行今承指揮  
太乙宮道童並依年例特賜度牒披戴緣有礙已降住  
給執奏指揮十一月二十三日奉聖旨特依已降指揮  
仍免執奏者右臣聞之一人無私則百官舉職惟治世

乃可議此陛下以道流幸遇誕節賜之度牒茲惟常理  
初無私也然禮部乃謂有礙執奏指揮是舉職也若不  
俯從則臣恐下懷苟且之心他日無以責其守法臣所  
惜者蓋在此而不在彼也所有錄黃臣未敢書行謹錄  
奏聞伏候勅旨

與宰相論李申甫改官事劄子

癸未

某近見朝士云李申甫特改宣教即賜緋朝廷不令經  
由後省亦不關報諸處徑行付吏部出告矣某初聞之

不信也蓋以朝廷若欲密用申甫故優進官秩則給舍亦豈肯沮格成命以壞幾事若止謂不欲宣布則批旨出劄子之時堂吏知之劄付吏部則長貳即官當行胥吏皆知之既到告院則主判之官書寫之吏又知之何獨關防給舍如此此某初聞之所以不信也明日以問給事中及當房舍人則皆曰未能錄黃某於是疑焉久之乃知吏部止憑三省樞密院機速房劄子而已毋惑乎朝士之云云也共惟相公以精識碩望任天下之重

正宜循守法度大振紀綱使人主有所敬畏國人有所矜式今此一舉頗異前聞諸公既未深思而遽為之有司又不知體而奉行之若每事如此大亂之道也願相公勿以遂事為是明諭機速房自行檢舉關報所屬收還元降劄子畫黃行下猶足以彰改過之善而弭不知者之謗未審鈞意以為然否又伏覩二月三日聖旨盡以堂闕歸部此朝廷厭紛紛之求示至公之道甚盛舉也然累日以來小使臣如浙西安撫司指揮權貨務號



簿官諸州贍軍酒庫之類除授紛然外譏籍籍皆謂頗類郡守監司將代籍之際乘時周旋人情萬一言者有所論列則前日之美意不幾於自壞乎亦願相公白諸公亟止之某備員官屬又辱知照偶有聞見不敢默默若揚已而歸非則某所恥也惟相公察之

繳駁龍大淵曾覲差遣狀

三月十三日同給事  
中金安節

準中書門下省送到錄黃一道龍大淵除知閣門事曾覲權知閣門事令臣等書讀者右臣等聞舜之稱堯有

曰稽於衆舍已從人夫堯以如神之智其臣莫及彼衆人區區之見豈能裨贊萬一哉然帝終不拂百姓以從已欲是乃所以為聖也聖人於已欲尚且能舍而况進退小臣豈係輕重何必拂諫爭之忠言戰天下之公議乎臣等於大淵覲功過能否初不詳知但見搢紳士民指目者多又聞臺諫相繼有言臣等亦不知其所劾何事也今大淵罷副都承旨覲罷御器械並以閣門處之論職事則或捨劇而就閒論班次則皆遷笑向使二人

不因紛紛擢寘此地尚有可諉曰恩也顧外議方喧而除命遽加論者必謂陛下自即位以來凡臺諫有所彈奏雖兩府如葉義問大將如成閔以至侍從要官欲罷則罷欲貶則貶一付公論畧無適莫獨於二人乃為之遷就諱避殆非帝克稽于衆舍己從人之義也臣等若奉明詔則臣等負中外之謗大臣若不開陳則大臣來中外之責陛下若不俯從則恐中外紛紛未止也况二人者攀附惟舊過此以往事君之日甚長倘其謹畏有

加何患身不富貴今若輕犯衆怨不少退聽是陛下將欲愛之適所以害之非計也所有錄黃臣等未敢書讀謹隨狀繳進以聞伏候勅旨

三月十六日三省同奉聖旨給舍未知功過臺諫止是防微罷劇就閒用允公論尚茲回繳可特依奏龍大淵已辭職在假候參假日別與差遣曾覲依舊帶御器械

與史丞相劄子

三月十五日

某伏蒙鈞慈親煩掾屬示以曲折非相公憂國之心切  
待下之道周豈易及此某雖不學然其心之所存相公  
固知之矣使宗社尊安身名俱泰豈非榮願顧不幸至  
于不可得已之地而委靡苟且則上負國家次累知己  
為世大僂相公亦安取此為今之計使二人者出奉外  
祠則士氣自伸公論自息然後某自以私計或疾病為  
請求一宮觀差遣仰以釋聖上朋黨之疑下以解二人報  
復之怨此上策也某非不知思權時之宜為調停之策

但若不決去則此輩必謂士大夫可以爵祿誘可以威  
命脅一墮其計人主信之愈堅任之愈篤禍發蕭牆毒  
流華戎是時相公任天下之責殆有甚焉故某以為莫  
若使臺諫給舍因此二人稍稍引去庶幾聖慮稍回知  
士大夫之不可輕近習之不可親易軌轍而新之猶為  
報國也古人尚以尸諫况因去就而有所益則亦何憚  
而不為哉古今未有自宰相至百執事人主一切輕視  
而能治天下者惟相公念大臣以道事君不可則止之

言而審處焉某感激眷憐固已素定若相公垂紳廊廟  
無階瞻望則願因書時有所獻異時功成名遂奉板輿  
以從赤松亦當不憚重趂進陪下客惟相公念之

同金給事待罪狀

三月十四日上

右臣等昨具奏龍大淵曾覲不當因臣寮論列遷知閣  
事蓋以職事所在思効其愚若夫從違惟上所命今日  
蒙宰相呼召至都堂宣示御札大畧謂臣等為人扇動  
議論群起且諭以在太上時小事不敢如此則是臣等

智識庸暗昧於事體不以事太上皇帝者事陛下專徇流俗輕瀆聖明為臣如此罪當萬死臣等見歸家待罪伏望聖慈重賜誅斥以為百官之戒臣等無任惶懼俟命之至

三月十五日三省同奉聖旨不允無罪可待

再同給事乞罷黜狀

十八日上

右臣等近緣繳駁失當家居待罪伏蒙聖慈特降睿旨謂其無罪可待尚寬嚴譴恭惟聖上海涵天覆之恩非



小臣靡捐所能仰報然臣等竊惟明主嘖笑為天下悵  
舒威令所加孰不震怖今臣等輒以愚瞽輕躋宸嚴上  
勤聖明親御翰墨曲垂宣示臣等仰觀內悖然無所措  
躬深悟愆尤甘從誅殛今雖蒙矜宥特屈刑章而臣等  
自惟所犯非輕乃茲幸免不惟孤恩負罪有愧班行亦  
恐公議有所不赦所以恐懼慙汗不避冒昧之誅而為  
是再三之瀆伏望聖度兼容皇明委照或未忍遽加誅  
戮即乞重賜寬諒以明邦憲以儆官聯席藁自言屏息

俟命謹錄奏聞伏候勅旨

三月十八日三省同奉聖旨不允


乞宮觀奏

左奉議郎試起居郎兼編類聖政所詳定官兼權中書舍人臣周某狀奏臣輒瀝血誠仰祈聖造伏念臣先塋多在吉州惟臣母葬信州久欲遷奉緣臣備數于朝力所未能爰自今年正月屢經朝廷陳乞假告繼又力請外祠而宰相不為敷奏因循至今人子之心晨夕不遑

緣此心氣怔忡居常抱病安能纂修記注攝替書命必  
繇曠職重抵司敗之誅若非觸冒萬死投誠君父則進  
退失據誰肯為臣言者伏望聖慈下臣此章宣問宰執  
如臣前此果因遷葬乞去非敢矯妄即乞授臣官觀一  
次使遂其區區之志臣今齒髮尚壯他時或有繁劇任  
使雖赴湯蹈火所不敢辭輕犯天威臣無任震灼俟命  
之至謹錄奏聞伏候勅旨

三月二十八日三省同奉聖旨依所乞差主管台州

崇道觀任便居住



文忠集卷九十九